

蔡忠惠公文集



宋端明殿學士蔡忠惠公文集卷十三

清裔孫

仕卹詒霞甫
廷魁經五甫

校梓

制誥

新除宰臣梁適祖文度皇任齊州禹城縣令累
贈太師中書令可贈兼尚書令餘如故制

勅易稱積善之家必有餘慶聖人之論豈苟而已朕
每延登宰輔財成教化者必褒顯前人追用愍冊旣
榮其家然後可以倚辦國事具官某祖某德望粹美
行實淳深竦拔之材蟠錯而不掄膺沸之泉淵渟而

必決回擁陰施啓佑令孫諮以謨猷寘于鈞軸逮茲
登用之始旌夫奕世之勤卽內史之崇階陟中臺之
總錄漏恩幽壤光顯慶門營魂有知其享予之休命

梁適祖母追封榮國太夫人衛氏可追封□國
太夫人制

勅人臣所以貴于當世者惟爵命之差故居宰府於
其始也追榮三世之廟示特絕於官師而表輔相之
重也具官某祖母惟爾孝孫嘗貳機政固已啓大國
之封而列小君之號今正鼎席助成萬務稽尊禮舊

申敘封壤疏恩至厚以光華於阡表而發揚於裔嗣
靈其鑒茲

梁適父顯皇任翰林學士右諫議大夫累贈太
師中書令可贈兼尚書令餘如故制

勅近以宰輔虛席擢任參貳以收其位朕念被命之
際入陟帝庭則陳道注委之大退款家廟罔不興劬
勞之感非有愍章追冊何以發揚其先烈而慰安其
孝心乎具官某父某以文業之茂中乎選首以才德
之劬登于禁塗蘊澤利之資而屈於當時積陰施之

厚而施于後世厥有嗣續弼予政機甫茲調燮之初
眷夫詒燕之遠稽考典故中命褒榮陞冠文昌顯賁
幽窆嗟爾九原之魄歆予三事之崇

梁適母追封安國太夫人閭氏可追封□國太
夫人制

勅進登宰路者所以其治人下而於其家必極褒崇
者非特慰夫幽塗亦以伸人了之榮遇也具官某母
天性靖嘉禮度雍穆挺生華閭嬪儷哲夫以淑慎之
美而表於壺儀以惇嚴之訓而勵于子姓肆爾令嗣

陟于台司，勸勤而發詠，蓼莪申恩，責而益陪湯賦。
進徹大國，舉成愍章，壤樹之華，斯其至矣。

宋觀文祖制

勅朕於羣公，褒其先廟，所以勉子姓之勤，大其私門。
所以切邦朝之助，爰諏吉旦，對越上靈，竣事均釐，莫
如舊弼。申褒祖服用，慰孝心具官某祖某道，充于中
材，浮於仕善政之澤，遺思在人，陰德之流，餘慶及後。
啓孫謀之方，上登宰路之猷，爲往于藩，宜適此禋祀。
追榮王考，舉錫公主，爰徹樂國之封，永賁幽阡之寵。

宋觀文父祀制

勅天子祀七世而祭上帝其禮莫與爲大公卿乃有
家廟以伸時享朕祿清明之宮奠泰元之坐升侑三
后丕薦孝誠念予大臣罔不懷其先正肆於慶澤均
被褒襃具官某父某性尚冲粹識照高邁材美不曜
磐于幕府德回復賙于子舍厥有令嗣登予上袞均
逸陪京之興述職大神之祀再荒名國申賁禰宮兼
隆特引之儀併爲追遠之數英魂不泯歆是愍章

宋觀文母韓氏封華原郡太夫人制

勅朕饗清廟登泰畤雖祖考歆侑孝誠上達然念劬
勞之德欲極天下之養莫可得已故於近輔有承顏
朝夕者首敷慶澤非特循典故異恩禮之然抑予心
之思推而下及也具官某母賢惠本於天資儀度隆
於閭閻誕生詰嗣嘗貳樞庭惟是忠誠率繇善訓逮
茲禋鬯之舉申錫慈闈之封徹視輿圖畫治名壤於
爲人母而觀厥子之有立於爲人子而及其親之恩
年又茲寵渥之蕃疇及私門之慶

宋觀文妻制

勅朕禮成帝時澤通海寓念予股肱元老往服藩政
既榮其躬又推而及其室所以表恩章之良厚具官
某妻某氏服儀德閼嬪儷宗工隆爲世範而有家節
之嚴助成賢業而有邦光之美向繇台席之命前治
國田之封建已上儀復申異數按於輿地錫以名疆
恩渥之蕃勿忘祇荷

張端明父制

勅具官某父某朕饗清廟登泰時雖祖考歆侑孝誠
上達然念劬勞之德欲極天下之養莫可得已故於

近侍首敷渥澤其有承顏慈闈者優異恩數非特典
故之然抑予心之思推而下及以爾涵德靖溫不櫻
俗累長厚之行率于鄉國清白之教嚴于家庭有子
材賢服于禁近願回禋嘗推奉親慶嘉其志尚重茲
美遷官聯陟芸書之清階品被銀章之美祇荷榮命
永懋忠訓

太子太師致仕杜衍可依前太子太師致仕加
食邑七百戶實食封二百戶制

勅朕齊明祇栗躬執牲玉以事宗廟上帝神天鑒格

蒙獲福應四海內外歡欣交通眷惟曩輔實助予德
數厥恩數以將厚意具官某以清修爲身檢以忠蓋
爲國謀昔正台衡進退以道歸休里閭誠心不懈泰
元修報慶澤周泊矧惟舊弼望隆天下增埤邑賦之
實復累功號之美併示優寵徃服休命

樞密使給事中王堯臣可金紫光祿大夫依前
給事中充樞密使仍賜推忠佐理功臣勳封實
食封如故制

勅朕親執牲玉祇饗郊廟人祇歡欣慶賚周浹惟予

弼輔大臣與圖機政陪侍祠事兢兢齊栗不有恩命
曷以章寵數之厚具官某自登宥密早夜悉心以持
國論罔不忠盡而於幾事區處中理材賢之稱著在
時議適講禋燔之禮竝推渥澤之異陞級彌峻爾其
懋哉

王觀文制

勅朕以純孝事親至誠饗帝每歷三歲躬造郊廟神
畀嘉福四海乂安顧于邇臣齊精奉祀不有慶澤曷
以將夫厚意具官某材資端茂行實清峻嘗與機政

久叅國論比延經業之美復陪講學之奧適已燔燎
均賚澤惠增衍田賦進承勲衛寵數之異勿忘祇服
給事中充集賢殿學士向傳式可加食邑三百

戶制

勅朕齊明祇栗躬執牲玉以事郊廟神天鑒格蒙獲
福應澤賚之行周于寓內况予近列奉祀於內述職
於外宜有恩數以彰寵異具官某才資沈厚履尚修
飭早登省闈休有風猷畱視宮鑰益彰才稱中壇展
報慶自近始增徹輿賦之奉序升陞品之榮勿忘欽

承以載光寵

王尚書制

勅朕臨海寓庶品安乂且三紀矣惟祖考畀予大憲
惟上帝祐予嘉應乃仲冬吉旦裸于廟奠于郊所以
薦誠而大報又念臣工之有竭忠純以輔予善者不
有豐澤曷以章夫厚意具官某惟爾先正克休令聞
執憲中臺叅論大政歷踐都座爲時顯人爾以端方
厚重而資之累於先覺向所履者咸紹前人相儀精
禮率繇儀度行之并賦楸以勳衛貤于而家以昭世

德之美

端明殿學士兼龍圖閣直學士張方平可加上
輕車都尉食實封二百戶制

勅人主上事郊廟下臨士民理適厥中茲謂興治朕
越下卯享于道祖翼日裸于太室又明日執牲幣以
見上帝已而赦天下大賚內外百執事推舉名典况
予近侍所宜先焉具官張某汝以文業登禁近以端
毅主典憲以通智總轉流之計以善惠布藩宣之政
逮茲祠事職奉常顓大正左右助相以成熙事念爾

賢勞躋升勳號增埤賦封欽哉服予之休命

端明殿學士給事中程戡可加上護軍食邑五
百戶翰林學士呂公綽可加護軍進封開國公
食邑五百戶制

勅朕齊明祗栗躬執牲玉以祀郊廟神天鑒格蒙獲
福應澤惠一作賚之行周于寓內况予近列奉祀於內

述職於外宜有恩數以章寵異具官某才資方重履
尚修飭早登禁密休有風猷鎮撫藩屏益彰材稱泰
元展報慶自近始增衍邑田之厚進列勳號之榮厥

恩茂焉勿忘祇載

王珪制

勅朕入清明之宮親泰元之祀祖考天地况施無疆
厥有秉文之士左右顯相而熙福之蕃嘉與均被具
官某才資敏茂行實端方奧學切於本元懿文美於
訓令回翔禁近光顯名譽逮嚴事於崇邱常先途於
法乘奉珍瓚於七室貢吉玉於中壇禮一作容雍和
志慮齊栗序升階次疏列社封竝爲寵渥之華益表
褒甄之異